

LA ME' NURRIZZA

Nun sacciu di me' matri la carizza,
l'abbrazzi, e di la naca la so' vuci;
ca natu mi purtaru a la nurrizza,
chi mi tinia 'ntra quattru canni 'ncruci.

Lu latti mi lu davi a stizza a stizza;
ed iu comu sucassi babbaluci,
faccia comu la lapa, chi s'appizza
supra li ciuri e trova meli duci.

Ora ca sugnu granni, quannu passa
santa mi pari e pari ca mi lassa,
'n'anticchia di 'ddu meli, comu a chiddu
chi detti a mia quann'eru picciriddu!